

DEO OPTIMO MAX.

210

UNI ET TRINO,

VIRGINI DEIPARÆ, ET S. LUÆ,
Orthodoxorum Medicorum Patrono.

QUÆSTIO MEDICO-CHIRURGICA:

*QUOD LIBETARIIS DISPUTATIONIBUS,
manè discutienda, in Scholis Medicorum, die Sabbati septimæ
mensis Martii Anno Domini M. DCC. XLIV.*M. JOANNE BESSE, Dotariæ Hispaniarum Re-
ginæ, dum viveret, Medico Primario, Doctore
Medico, Præsidente.*An ubi Partus difficilis ac desperatus, tentanda, etiam in matre vivâ, Sectio
uteri Cæsarea?*

I.

CONCIPERE, Gestare, Parere tria sunt fœminæ à naturâ necessariò
imposita. Conceptus facilis, Gestatio operosa, Partus dolorum & alæ ple-
nus. Inter multiplices Partuum species, unus præ cæteris crudeli apparatu
formidandus Partus Cæsareus, à cæso Parturientis utero sic appellatus. (a)
Vulgo definitur, Operatio illa quâ fœtui nullâ omninò arte per vulvam ex-
trahendo, cæso matris utero, præbetur exitus. Antiquis olim in matre vivâ, ut
conferere est, intentatus, audaci recentiorum debetur solertia. Nec ab ipsis etiam
huic unanimi voce acclamatum est; laudibus eum alii, alii probis exceperunt. Nos
verò utrorumque ritè pensitatis rationum momentis, litrem juvat uno argumento
componere.

Quidquid in desperatis morborum angustiiis Medicina tentat, illud possibile sit &
necessarium satis est. Hæc duo verè sunt circumscripti nostræ omnium audaciæ fines,
quos ultrâ vel citrà nequit rectum consistere. His olim accuratè prævisis, priores Me-
dici, nihil sibi arduum esse meritò confisi, ac iisdem auspiciis per scabrosas &
nulli calcatas umquàm, sed permeabiles vias, ad ægrorum utilitatem viriliter molien-
tes, Chirurgiam optimâ illâ ditaverunt Operationum copiâ, quæ toties morienti sa-
lutem, Operanti laudem, Artique nostræ nomen immortale conciliârunt. Sic primo
aspectu immanem, ac eventum tantummodò confirmatam, evellendæ ani Fistulæ me-
thodum docuerunt; sic calculum ex incisâ vesicâ extrahere aggressi sunt, idque fe-
licissimo cum successu: sic tandem illud omne, etsi inauditum, audacè tentavè-
re quod fieri posse spondebat sedula rei naturæ inquisitio, & aliundè necessariò postu-
labant summæ morbi angustia; sic etiam nos, illorum autoritate ac exemplis freti,
statuimus admittendam esse Sectionem uteri Cæsaream, etiam si plurimorum obtre-
stationibus notatam, eo tantum nomine quod sit reverà possibilis, & quandoquæ
necessaria; quodquidem utrumque ratione & experientiâ comprobandum.

(a) *Auspicatius* (inquunt Plinius, Hist. Nat. L. 7. C. 9.)
enellâ parente gignuntur, sicut Scipio Africanus prior natus;
primusque Cæsarem à cæso matris utero dictus. Hæc ultima
verba magnam inter Auctores inopertunt discordiam. Hæc

alii de Scipione, alii de Julio Cæsare volunt esse intelli-
genda. Quidquid sit, cum ea quæstio parum ad Thesum
nostram faciat, illorum me disputationi nolim immis-
cere.

TRIA sunt in Partu Cæsareo incidenda: Musculi Epigastrici, Peritonæum, ac tandem ipse Uterus; adeoque si quid illius possibilitatem infirmaret, certè vel insignis in hisce partibus sectionis amplitudo, vel hæmorrhagia necessariò inde oriunda.

Verùm 1^o. quoad sectionem, ea est longè brevior quam potest ex inspectu judicari. Sedulo enim annotandum mulieris parturientis abdomen gravidæ uteri tumore in omnem sensum ultra modum dilatari, illudque erupto fœtu, subito fieri infinitè se ipso minus; proindeque & dictam sectionem eadem debere proportionem decrescere quàm ipsum decrevit abdomen: eamque, si intra operationem sex pollicum v. g. longitudinem obtinebat, post extractum Cæsarem, revocatis mox in se partibus sectis, vix futuram esse quatuor transversos digitos longam. Numquid ergo insanabile aut inauditum quid abdominis tale vulnus? Hæcine Celsus (a) & Aegineta (b) cum in reducendo captivo intestino ampliandam volunt epigastrii plagam? Quod autem de Musculis Epigastricis asserimus, idem de Peritonæo intelligendum, idem de Utero: imò uteris, utpotè peculiari ac validiori virtute contractili donatus, citius adhuc prædictis partibus constringitur, fibræque illius ad decurtationem spontè innixæ eò brevitatis deveniunt, ut secundà à partu horâ, (c) is pugni molem vix æmuletur, adeoque vulnus huic inflatum levissimi jam sit momenti. Non itaque adeò pertimescenda Uteri, modica quidem, incisio, cum præterea totum ipsum uterum, (d) salvâ muliere refecari & avelli posse autoritate & experienciâ confirmetur.

II^o. Uterus, ut aiunt adversarii, reticulari vasorum ubique perreptantium compage instructus, per gestationis ac puerperii tempus imprimis multo sanguine ad fortis nutritionem admodum turgidus, nullam sui pati potest sectionem quin largâ statim oriatur hæmorrhagia. Esto. At verò nonne stupenda illa, quam exitiosam tam iniquè conclamitas, sanguinis emissio naturæ legibus consentanea est; imò puerperæ necessaria? Nonne eadem fere quantitate cruor, etiam in partu naturali, è vasis à secundinarum avulsione laceratis effluit? Nonne tandem luctuosos mille Tragedias quotidie movet sanguinis illius post fœtum expulsum superflui retentio? Nec forte dixerint immoderatum hunc sanguinis fluxum nullâ arte fore compescendum. His etiam natura bene provida videtur consuluisse. Quod in partu naturali, idem in Cæsareo accidet: Vasa uterina mammariis communicantia sanguine suo in mammas ad lactis fabricam, ex naturæ instituto, deplebuntur. Vasorum in Utero sauciatorum oscula supradictâ contractione constringentur, minuentur, occludentur; (e) vasaque magis arcta plus resistent sanguini hùc deponendo. Tandem vulneris labra eadem contractione in sese collapsa sanguinem è resectis vasis erumpentem mutuo contactu coercebunt.

His adde 1^o. Longè abesse à Musculis incidendis nervos, aponevroses, tendines, & similes alias partes quæ possent spasmi periculum inducere. 2^o. Peritonæum, etiam si nervis ubique intertextum, absque omni convulsioni metu posse vulnerari, cum & in aliis operationibus feliciter abscindatur. 3^o. Demùm Uterum, in dicto casu ab omni irritatione plarumque immunem, tutius posse incidi, quam vesicam v. g. quæ in calculosis, etiam si calculi præsentia, aut urinæ morâ inflammata, quotidie tamèn impunè inciditur. Jam nunc quæ ratiocinio demonstrata est operationis nostræ possibilitas, experienciâ confirmetur.

(a) Si angustus vulnus est quàm intestina commodè refundantur, incidendum est donec satis pateat. A. C. Celsus Lib. 7. Cap. 16.

(b) Si igitur parvum fœcis vulnus, ut prolapsum intestinum inflatum non amplius reprimi possit, necesse est hoc Harum evacuare, aut vulnus majus efficere. . . . si vero ab horumdem usu intestinum adhuc permanferit inflatum, tantum de Peritonæo incidere oportet quantum opus habet id quod prohibum est. P. Aegineta Lib. 6.

Cap. 52.

(c) Mauriceau, Tom. 1. Cap. 4.

(d) Si vero ubi per tempus mansit putrefactum fuerit id quod prociat, (uterus) auferetur id citrà omnis petiuli formidinem. Nam totum ablacum esse uterum putrefactum narrant, & tamen mulierem vixisse. P. Aegineta Lib. 3. Cap. 72.

(e) Boerhaave Inst. Med. No. 687.

NON sanè in rebus Medicis omni observationum generi credendum: nec tamen omnibus planè diffidendum. Non unus est, ut fateor, nugivendus Agyrta popularis auræ cupidus, qui scurriles quotidie fabulas peregrini mendacii colore fucatas stolidæ plebeculæ miraculis semper inhianti sesquipedalibus verbis declamare audeat; verùm adsunt etiam viri, probitate nec non & facillitate gravissimi, qui, mercatam veritatis pretio inanem gloriolam benè dedignantes, ad publicam utilitatem seria conscripserunt. Inter illos imprimis omnem mendacii suspensionem videtur effugisse Fr. Rossetus de Partu Cæsareo probatæ fidei narrator. Non ille commentitias & affabre confictas observationes, aut inconcinna delirantium anicularum somnia recitasse arguendus, (a) qui secandi artifices, sectas Matronas, earum viros, domicilia, sectionum tempus, annum, mensem, diemque scrupulosè designavit; idque imprimis inter invidos mordacium adversariorum dentes, quiquidem, si à verò vel tantillum declinasset, mendacem sanè numquam desissent allatrare. At ne Rossetum solum sectionis Cæsareæ possibilitatem exemplis confirmasse credideris. Scitent authores, (b) iique spectatissimi, observationibus Operationi nostræ consonis, quas sigillatim enumerare longius foret & tædiosum. Quid plura? Nonne ob oculos habemus mulierem illam Parisiis adhucdum degentem, quam, ob depravatam pusilli corporis conformationem, per vias naturæ dicatas parere numquam potuisse certum est: quam tamèn die Junii 7^o. anni 1740. Cæsareâ uteri sectione, foetu cum matre superstiti, liberatam fuisse Chirurgi scripserunt? (c) His omnibus satis, ut arbitror, stabilita mihi videtur sectionis nostræ possibilitas, ad illius necessitatem citò propinquamus.

(a) Rossetus de Partu Cæs. pag. 40.

(b) Authores qui cum Rosseto sectionis Cæsareæ exempla reculerunt, hi sunt præcipui; Gasp. Bauhinus. Mattheus Cottaux. Schenkius. R. P. Theoph. Raynaudus Soc.

Jesu Theologus. J. Rulau Chirurgus Sanctionus. La Motte. Hent. Deventer. Hist. Reg. scien. Acad. ann. 1710, &c.

(c) Acta Chirurgorum. Recherches sur l'Opération Cæsarienne. Pag. 647.

I V.

TOT mulieres trucidatas fuisse usquè dixerim, quot procelloso jactatas desperati partus Oceano, ademptâ sacrâ salutis anchorâ, utero scilicet andacièr non secto, sorti suæ relictas fuisse audiero. Nec certè culpandus ille minùs qui inter acutos morientes cruciatus, consideratâ nimium prudentiâ timidus Tragediæ sedet spectator otiosus, quàm qui, præcipiti confidentiâ ferox, ac corde, ut ita dicam, ahæneo, ferratis semper manibus languentem præposterè frustrâ cruentaret. Est modus in rebus. Ast ubi semel accuratè deprehensio Partus naturalis obice, matrem Operationi ferendæ haud imparem esse ritè cognitum est; jam ne quem intempestivè misericordem moveant tristes Lucinanti advocantis huiusmodi, non, irritis conatibus frustrâ diù exagitata, vani dolores, sed, attentus naturæ minister, quod illa renuit exequi munus adimpleat ipsi vicarius, fugientesque animas, ex Orci faucibus eripere fortiter aggrediatur. At, insurget aliquis, ut quid tandèm discerpas sic mulieres lethali cruciata frustra juvat excarnificari? Nonne adsunt præ manibus unci, forcipes, & alia centum id genus quibus demortuus utero fetus extrahatur? Bene quidem! At verò quid proderunt tua illa à te tantoperè decantata Partus difficilis adminicula, si foetus sit hydrope v. g. ultrâ modum tumidus, aut prægrandi capite donatus? Quid si gravide distortis ossibus pelvis male conformata? Si pudendum naturâ suâ solito arcibus, vel annis induratum, & tantæ distractionis nescium? Si tumore interno angustatum, aut cicatrice constrictum? Quo jure, vitæ hominum arbiter imprudens, in auras nitentem puerulum, antè ortum mori jubes, ac in ipso vitæ fonte sepeliri? At tu, qui te tam iniquè carnificem vocas, quo te nomine possem appellare, si tibi fortè objicerem tot pueros impiâ cunctatione absquè sacro Baptismatis lavacro inæreptos? Dilaniata tot foetuum (nonnumquam vivorum) membra, cum lacerò sæpius

parturientium utero frustulatim avulsa? Tot denique barbarè extortas mulieres, & de medio improbè cum prole sublatas? Ne te igitur pigeat raram quidem, sed optimam partui desperato, imò quandoque necessariam medelam agnoscere.

V.

UT tamèn mentem luculentè aperiàm, observandum me non cuilibet indistinctè mulieri difficulter parienti Operationem meam imponere. At si nulla spes Partùs naturalis affulgeat, idque ex probè cognito ac insuperabili impedimento, si sit aliundè mulier sat vegeta, nec diuturnà nimis Partùs expectatone viribus omninò destituta, jam cunctari ridiculum, artique indecorum. Sic àni Fistulæ Operatio (a) prioribus Medicis usitatissima, & à Celso tam doctè descripta, sub finem sæculi proximè elapsi ægrè tantùm ac suspensà manu, ex audaciæ ac solertiæ defectu, tentata est. Cum igitur audaces juvare Fortuna gestiat, ne nos, nostris patribus cognitionum numero ac doctrinæ sinceritate longè superiores, animo tantùm videamur impares. Ne Sectionem uteri Cæsaream, sæculo 16^o. tanto plausu ac successu celebratam, ac in nostrà etiàm ætate nupèr quasi ex oblivione redivivam aggredi vereamur. Ne tandem Chirurgiam ad ultimam perfectionis suæ periodum perduxisse gloriemur, nisi inventis eam adhuc magis ac magis quotidie illustremus. Multa quidè inventa: multa tamèn inveniènda, quin & plura perficiènda. Denique, ut ad Theos meæ scopum revertar, maneat altà mente infixum, inconcussum illud artis nostræ præceptum: nempe in extremis ea semper omnia esse tendenda quæ possibilìa sunt & necessaria: adeoquè, cum Sectionem uteri Cæsaream, etiàm in matre vivâ, possibilem esse ac necessariam hucusque evictum sit, mecum ultro concludendum,

Ergò ubi Partus difficilis ac desperatus, tentanda, etiam in matre vivâ Sectio uteri Cæsarea.

(a) Des Moyens de former de parfaits Chirurgiens. Ora-¹ Fectet, hujus Academi. Professore.
tio Publicè habita hoc anno in Scholis Medicorum à D.]

DOMINI DOCTORES DISPUTATURI.

M. Josephus-Exuperius Bertin,
Supremi Palatiæ & Moldaviæ
Principis Medicus Primarius.

M. Joannes-Ludovicus Baude
de Lacroix, Rei Herbariæ Professor.

M. Carolus Dionis.

M. Gedeon de Rabourt.

M. Laurentius Ferret, Chirurgiæ
Gallicæ Idiomate Professor.

M. Joannes Midy.

M. Nicolaus le Roy de S. Aignan.

M. David Vasse.

M. Andreas Seron.

Proponebat. Parisiis, JOSEPHUS LALLEMANT, Lingonæus, Saluberrimæ Facultatæ Medicinæ Parisiensis Baccalaureus, A. R. S. H.
1744. à sextâ ad meridiem.